



Na osnovu člana 70. st. 1. i 2. Zakona o organizaciji organa uprave u Federaciji BiH („Službene novine FBiH“, broj 35/05) i člana 6. stav 1. Pravilnika o bližim uvjetima u pogledu prostora, opreme i kadra, kriterijima za osnivanje i obavljanje apotekarske djelatnosti u svim organizacionim oblicima, kao i načinu i postupku njihove verifikacije („Službene novine Federacije BiH“, br. 44/12, 23/13 i 27/14), Ministarstvo zdravstva Kantona Sarajevo donosi

ODLUKU
o slobodnim lokacijama za osnivanje apoteka za 2016. godinu
na području Kantona Sarajevo

I

Ovom Odlukom definišu se slobodne lokacije na području Kantona Sarajevo za 2016. godinu za osnivanje apoteka, u skladu sa demografskim i geografskim kriterijima utvrđenim Pravilnikom o bližim uvjetima u pogledu prostora, opreme i kadra, kriterijima za osnivanje i obavljanje apotekarske djelatnosti u svim organizacionim oblicima, kao i načinu i postupku njihove verifikacije („Službene novine Federacije BiH“, br. 44/12, 23/13 i 27/14) (u daljem tekstu: Pravilnik).

II

U skladu sa utvrđenim kriterijima propisanim čl. 3 i 4. Pravilnika, Ministarstvo zdravstva Kantona Sarajevo, utvrđuje slobodne lokacije za osnivanje apoteka za 2016. godinu, po mjesnim zajednicama u općinama na području Kantona Sarajevo kako slijedi:

1. Općina Ilidža – 2 apoteke
 - za područje Mjesne zajednice Blažuj – 1 apoteka
 - za područje Mjesne zajednice Stup 2 – novo naselje Tibra – 1 apoteka
2. Općina Hadžići- za područje Mjesne zajednice Binježevo – 1 apoteka
3. Općina Vogošća za područje dijela Mjesne zajednice Kobilja Glava prema Mjesnoj zajednici Hotonj – 1 apoteka
4. Općina Novo Sarajevo - za područje Mjesne zajednice Hrasno brdo 1 apoteka
5. Općina Centar – za područje Mjesne zajednice Soukbunar – 1 apoteka
6. Općina Stari Grad – za područje Mjesne zajednice Kovači -1 apoteka


III

Međusobna udaljenost između dvije apoteke ne može biti manja od 400 metara najbliže cestovne povezanosti.

Međusobna udaljenost apoteka iz stava 1. ove tačke utvrđuje se geodetskim izmjerom ovlaštene osobe za obavljanje geodetskih poslova shodno važećim propisima iz ove oblasti.

IV

Na podnijeti prethodni zahtjev osnivača buduće apoteke odnosno budućeg nositelja odobrenja za privatnu praksu, Ministarstvo zdravstva Kantona Sarajevo će izdati saglasnost da se na toj lokaciji može osnovati apoteka.



Osnivač buduće apoteke odnosno budući nositelj odobrenja za privatnu praksu kojem je izdata prethodna saglasnost na lokaciju dužan je podnijeti zahtjev za osnivanje apoteke s potpunom dokumentacijom shodno Pravilniku najkasnije tri mjeseca od dobijanja saglasnosti.

Ukoliko u roku utvrđenom u prethodnom stavu budući osnivač ne podnese Ministarstvu zdravstva zahtjev s potpunom dokumentacijom za osnivanje apoteke shodno Pravilniku, ista će se poništiti i izdati drugom podnositelju koji ispunjava kriterije utvrđene ovom Odlukom.

Budućem nositelju odobrenja za privatnu praksu, odnosno budućem osnivaču apoteke na lokacije utvrđene u tački II Odluke o slobodnim lokacijama se može izdati samo jedna prethodna saglasnost.

V

Ova odluka stupa na snagu danom donošenja i bit će objavljena u Službenim novinama Kantona Sarajevo i na web stranici Ministarstva zdravstva.

O b r a z l o ž e n j e

U skladu sa članom 6. Pravilnika o bližim uvjetima u pogledu prostora, opreme i kadra, kriterijima za osnivanje i obavljanje apotekarske djelatnosti u svim organizacionim oblicima, kao i načinu i postupku njihove verifikacije („Službene novine Federacije BiH“, br. 44/12, 23/13 i 27/14), kantonalno ministarstvo zdravstva, određuje slobodne lokacije na kojima će se osnivati apoteke. Pored demografskih i geografskih kriterija utvrđenih u članu 3. i 4. pomenutog Pravilnika, Ministarstvo zdravstva je cijenilo potrebe lokalnih zajednica za apotekarskom službom sa aspekta potreba stanovništva uzimajući u obzir ukupan broj stanovnika tog lokaliteta i postojeći broj apoteke, te saobraćajnu povezanost apoteke i dostupnost stanovništvu.

Prilikom dodjele prethodne saglasnosti budućim nositeljima odobrenja za privatnu praksu, odnosno budućim osnivačima apoteke, Ministarstvo zdravstva će naročito cijeniti položaj apoteke, odnosno udaljenost apoteke u odnosu na ambulantu, dostupnost stanovništvu buduće apoteke sa aspekta radnog vremena, garanciju o pružanju usluga najmanje 5 godina bez prava prenosa osnivačko vlasničkih prava na druga pravna i fizička lica, udaljenost od najbliže postojeće apoteke a koja ne može biti manja od 400 m cestovne udaljenosti kao i zapošljavanje lica koja se vode na evidenciji JU Služba za zapošljavanje Kantona Sarajevo. Ukoliko osnivač budućeg ogranka apoteke već posjeduje PZU na području Federacije BiH/BiH i/ili je pružao farmaceutsku uslugu na području Bosne i Hercegovine/Federacije BiH, Ministarstvo zdravstva će cijeniti dosadašnje iskustvo, odnosno zadovoljstvo korisnika uslugama, najmanje za dvije posljednje godine rada apoteke, posebno od dobavljača i Zavoda zdravstvenog osiguranja Kantona Sarajevo.

Ukoliko na istoj lokaciji bude više zaprimljenih zahtjeva budućih nositelja odobrenja za privatnu praksu, odnosno budućih osnivača apoteke koji ispunjavaju sve kriterije, ministarstvo će odlučivati prema redoslijedu kojim su podnešeni prethodni zahtjevi.

Imajući u vidu naprijed navedeno odlučeno je kao u dispozitivu ove Odluke

Broj: 10-05- 9626 /16
Sarajevo, 23.03.2016.godine



web: <http://mz.ks.gov.ba>
e-mail: mz@mz.ks.gov.ba
Tel: + 387 (0) 33 562-104, Fax: + 387 (0) 33 562-243
Sarajevo, Reisa Džemaludina Čauševića 1

